

Uunga siunnersuut: Meeqqat tapersersorneqarnissaannut Inatsisartut inatsisaata allanngortinnissaa pillugu Inatsisartut Inatsisaat

(Meeqqanut ilaqtariinnullu sullissivinnut tunngavissaqarnissaq, digitaliusumik ataatsimoorfiusumik sulianik suliarinnittaaseqalernissaq, Isumaginninnermut Aqutsisoqarfiup suliassaasa il.il. erseqqissaaffiginissaat.)

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Akissuteqaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Aappassaaneerinnineq

Naalakkersuisut Ilaqtariinnermut Peqqissutsimullu Ataatsimiititaliap siunnersuummik matuminnga peqqissaarussillutik suliaqarsimanerannut qujaniarput.

Siunnersuutip tamanut tusarniutiginnissaa sioqqullugu soqutigisallit attuumassutillit inatsisip piareersarlugu suliarinnissaani ilaatinneqarsimanngimmata ataatsimiititaliap maluginiarpa.

Naalakkersuisut tassunga atatillugu malugeqqussavaat kommunit ilaqtariinnut sullissiviit pillugit paasititsiniaanerit aqqutigalugit peqataatinneqartarsimmata, paasititsiniaanernilu sullissivinnut tunngaviusumik ilisarnaatissamut oqallittoqarlunilu siunnersuusiortoqarsimavoq. Ilaqtariinnut sullissivinni sulisut paasititsiniaanerni tamani peqataasarsimapput, sulisunullu pisortat paasisitsiniaanerit ilaannut peqataasarsimallutik. Taamatut sulisoqarnera ilaatigut inatsisissatut siunnersuummut matumunnga aamma meeqqanut ilaqtariinnullu sullissiviit pillugit nalunaarutinngortussamut tunngavissiisimavoq.

Naalakkersuisut sullissivinnut kommunini tamani illoqarfinnilu pilersinneqareersunut sulisussanik ilisimasalinnik sulisussarsiortarnermit unammilligassanut assut eqeersimaarput. Taamaammatt sullissivinni sulisut piginnaasamikkut ineriartortitsiffiunissaat pillugu Naalakkersuisut kommuninik oqaloqateqartarput.

Kommunerpassuit kommunini sulianik suliarinnittarnernut ikiorneqartarnissamik ujartuisimapput, tamannalu pillugu ikiorneqarnissaq Isumaginninnermut Aqutsisoqarfiup nukissai apeqqutaallutik piareersimaffiginiarneqarsimavoq. 2021-imiit 2023-mut kommunini tamani sulianik suliarinneriaatsimik digitaliusumik pilersitsisoqarsimavoq, tassungalu atatillugu Isumaginninnermut Aqutsisoqarfimmi sulianik ilisimasallit amerlasuut ineriartortitsinernut, sanileriilluni ilinniartitsinernut kommuninilu pikkorissaanernut atorneqarsimapput.

Siunnessaq eqqarsaatigalugu kommunini tamani meeqqanut suliat digitalikkut suliarisarnerat qarasaasiakkut siunnersuisoqartillugu ilitersuisoqartillugulu ikiorsiinernut annerusumik kommuninut tamanut periarfissaqartitsilissaaq.

Ilaqtariinnut siunnersuisarnernut ilaqtariinnullu ilitersuisarnernut tunngatillugu tamanna meeqqanut ilaqtariinnullu sullissiviit pillugit nalunaarutinngortussap suliarinnissaanut ilanngunneqarumaarpoq.

Naalakkersuisut meeqqanut utaqqiisaasumik inissiivinni inissinneqartut inatsisitigut isumannaatsuunerannut toqqissimanissaannullu assut ernumassuteqarput. Taamaammallu ulloq unnuarlu paaqqinnittarfiit pillugit nalunaarutip kiisalu meeqqat tapersersorneqarnissaannut nalunaarutip kukkunersiuiiffiginissaat aallartinneqarsimapput. Kommunik, ulloq unnuarlu paaqqinnittarfinnik MIO-millu ataatsimeeqateqarnerit ingerlanneqareersimapput.

Taamatut oqaaseqarlunga siunnersuut Inatsisartunut suliarisassanngorlugu Naalakkersuisut ingerlateqqippaat.